



FOTOS PIXABAY.COM

Nagut per l'eternitad

DA VIOLA PFEIFFER

■ **Cura ch'jau hai cumenzà da scriver mias columnas era jau persuadida ch'i saja il pli grond cletg per mai da pudair scriver mes texts per rumantsch. Betg pervia ch'jau amava talmain il linguatg.** Ed era betg perquai ch'jau era persuadida ch'ins stoppia spender il rumantsch. Mabain perquai che las pussaivladads ma parevan infinitas. Jau pudeva sdiavlar da mes scolasts e disfamar mias amias. Jau pudeva scriver da mia vita d'amur e perfin ingiurar mes vischins. E tut perquai che quellas persunas na legevan betg mias columnas perquai ch'el las eran per rumantsch. Mia vita aveva da lez temp anc lieu praticamain sulet giu la Bbassa e mes conturn consistiva, sch'ins laschava ina giada da la vart mia famiglia, praticamain mo da gliedud da lingua tudestga. In vair siemi per mintga columnist. Jau pudeva scriver tge ch'jau lev, senza stuair avair tema da las consequenzas. Ch'ins pudeva online era leger las columnas per tudestg na raquintav'jau natiralmain a nagin. Ma insacura è natiralmain capità l'inevitabel, il mument che vegn en la vita da mintga persuna rumantscha engaschada plitost baud che tard: La Ru-

mantschia m'ha clamà sut las armas. Il cumond da marsch vegniva en furma dal presidi da la ULR e cun ina giada udiv'jau tar mintga occasiun: «Ah, jau hai gist legì tia columna. Ti dormas anc cun animalets da plisch? Tge chautschas portas oz? Dias in salid a tes bab, el para simpatic.» L'anonimidad da la Bassa era persa.

Tuttenina stuev'jau quintar cun in pli grond public dad enconuscents. Tge sche jau arriv a la proxima sesida dal cussegl da la Lia Rumantscha ed jau vegn dumandada sche la charplina cun mes ami è uss ida or en bain? U sche mes barshun da dents è ussa cotschen u verd?

Cun ina giada n'era il privel betg pli che mes tat di suenter mias columnas sur da posiziuns da sex u dal far pops: «Oh, also quai avessas ussa schon betg stuì scriver», mabain ch'il president da la Lia Rumantscha fa quest commentari. Uschia stuess jau uss atgnamain ponderar meglier tge ch'jau scriv en mias columnas. Ma jau hai gea il cletg da scriver per rumantsch. In linguatg che nagin na chapescha pli en 100 onns. Nagut per l'eternitad. Jau na stoss pia betg ponderar cura ch'i fiss meglier da taschair. Ubain?

L'autura è doctoranda e columnista